

## VIBRACIÓNS E ONDAS

### PROBLEMAS

**1.-** Un sistema cun resorte horizontal estirado 3 cm sóltase en  $t=0$  deixándoo oscilar libremente, co resultado dunha oscilación cada 0'2 s. Calcula:

- A velocidade do extremo libre ó cabo de 19 s
- A aceleración do extremo libre ó cabo de 19 s (Considérase que o amortecemento é desprezable)

### SOLUCIÓN

a) O resorte deixado libre describe un MHS, polo tanto, correspóndelle unha ecuación para a elongación:  $x = A \sin(\omega t + \phi_0)$

No instante inicial, a elongación é máxima e  $\sin(\omega t + \phi_0) = 1$ , e como  $t=0$   $\phi_0 = (\pi/2)$  rad, quedando a ecuación :  $x = A \sin(\omega t + \pi/2)$

Do mesmo xeito podemos razoara para a velocidade, que resulta  $v = A \omega \cos(\omega t + \pi/2)$

$$A = 3 \text{ cm} ; \omega = 2\pi/T = 2\pi/0'2 = 31'416 \text{ rad s}^{-1}$$

Substituíndo os datos anteriores e o tempo transcorrido:

$$v = 3 \cdot 31'416 \cdot \cos(31'416 \cdot 19 + \pi/2) = 0 \text{ ms}^{-1}$$

b) Os mesmos razoamentos son aplicables neste caso, quedando:

$$a = - A \omega^2 \sin(\omega t + \pi/2)$$

$$A = 3 \text{ cm}$$

$$\omega = 2\pi/T = 2\pi/0'2 = 31'416 \text{ rad s}^{-1} ;$$

$$a = - 3 \cdot 31'416^2 \cdot \sin(31'416 \cdot 19 + \pi/2) = - 29,6 \text{ ms}^{-2}.$$

A velocidade é nula e a aceleración máxima (pero negativa), atopándonos na situación inicial, xa que transcorreu un número enteiro de períodos. Por erros de redondeo na calculadora ou ordenador, pode darse o caso de que o resultado da velocidade non resulte 0 exactamente.

**2.-** Un corpo sometido a un movemento harmónico simple realiza 10 oscilacións por segundo. Calcula:

- A aceleración no centro de oscilación.
- A aceleración nun dos seus extremos, sabendo que a amplitude do movemento é de 9 cm.

### SOLUCIÓN

a) A ecuación do movemento harmónico simple é:  $x = A \sin(\omega t + \phi_0)$

onde  $A$  é a amplitude do movemento,  $\phi_0$  un desfase constante ó longo do tempo, e  $\omega$  a pulsación.

Sabemos que a velocidade, no movemento harmónico simple, é a derivada da elongación con respecto ó tempo:

$$v = A \omega \cos(\omega t + \phi_0)$$

E que a aceleración é a derivada da velocidade con respecto ó tempo:

$$a = -A \omega^2 \sin(\omega t + \phi_0)$$

No centro de oscilación, a elongación é cero, logo :  $0 = A \sin(\omega t + \phi_0)$

É dicir:  $\sin(\omega t + \phi_0) = 0$ ; Logo a aceleración será:  $a_0 = 0$

b) Nos extremos da oscilación, a elongación é máxima,  $x=A$  ou ben  $x=-A$ .

É dicir:  $\sin(\omega t + \phi_0) = 1$  ou ben  $\sin(\omega t) = -1$

Logo o valor absoluto da aceleración será  $a = A \omega^2$

$$A = 9 \text{ cm} = 0,09 \text{ m} ; n = 10 \text{ osc.s}^{-1} = 10 \text{ Hertzios} ;$$

$$\omega = 2\pi/T = 2\pi \cdot n = 62,83 \text{ rads}^{-1}$$

$$\text{substituíndo, obtemos: } a = 0,09 \cdot 3947,61 = 3,5 \cdot 10^2 \text{ ms}^{-2}$$

**3.-** Un corpo de 10 g de masa desprázase cun movemento harmónico simple de 80 Hz de frecuencia e de 1 m de amplitude. Acha:

- A enerxía potencial cando a elongación é igual a 70 cm.
- O módulo da velocidade cando se atopa nesa posición

### SOLUCIÓN

a) A enerxía potencial dun corpo sometido a movemento harmónico simple é:

$$E_p = (1/2)m\omega^2 x^2$$

$$m = 10 \text{ g} = 0,01 \text{ kg}, x = 70 \text{ cm} = 0,7 \text{ m}, n = 80 \text{ Hz}$$

$$\omega = 2\pi/T = 2\pi \cdot n = 2 \cdot 3,14 \cdot 80 = 502,65 \text{ rad.s}^{-1}$$

Substituíndo e operando, obtemos:

$$E_p = 0,5 \cdot 0,01 \cdot 252661,87 \cdot 0,49 = 6,2 \cdot 10^2 \text{ J}$$

b) Como sabémo-la enerxía mecánica é a suma da enerxía cinética e da enerxía potencial e, como a forza causante do movemento vibratorio harmónico é unha forza conservativa, permanecerá constante ó longo de todo o percorrido, de xeito que na posición de equilibrio atoparíase totalmente en forma de enerxía cinética e nos extremos en forma de enerxía potencial.

$$\text{Polo tanto } E_{\text{mecánica}} = E_{\text{Pmáx}} = (1/2)m\omega^2 A^2$$

$$\text{Substituíndo } E_m = (1/2)0,01 \cdot 502,65^2 \cdot 1^2 = 1263,29 \text{ J}$$

Calculamos agora a enerxía cinética nese punto como diferenza entre a enerxía mecánica e a enerxía potencial nese punto

$$E_c = E_m - E_p = (1/2)mv^2$$

$$E_c = 1263'29 - 619'02 = 644'27 \text{ J} = (1/2) \cdot 0'01 \cdot v^2$$

de onde resolvendo obtémo-la velocidade

$$v = [(644'27 \cdot 2) / 0'01]^{1/2} = 36 \cdot 10^2 \text{ ms}^{-1}$$

**4.-** Un péndulo eléctrico está formado por unha esfera metálica de 1 g colgada dun fio moi fino de 1'5 m. Faise oscilar nunha rexión na que existe un campo eléctrico uniforme vertical e cárgase a esfera con  $1'3 \cdot 10^{-8}$  C. Cando o campo é vertical de abaixo arriba, a esfera efectúa 100 oscilacións en 314 s e se o campo está dirixido de arriba abaixo, tarda 207 s en dar 100 oscilacións. Calcular:

a) Intensidade do campo eléctrico.

b) Valor de "g" no lugar da experiencia.

SOLUCIÓN

a) Aplicando consideracións derivadas da dinámica do péndulo simple poderemos deducí-la dependencia do período do mesmo coa  $F_t$  responsable de dito movemento harmónico, que debe cumprí-las condicións de forza elástica derivadas da lei de Hooke.

Suporémo-las habituais consideracións de oscilacións pequenas para chegar ó cumprimento de M.H.S. (senf @  $f = x/l$ )


$$F_t = -(P - F_e) \text{sen} f = - (P - F_e) f = - (P - F_e) x/l$$

Para o caso 1:

$$F_t = -kx \Rightarrow k = (P - F_e)/l$$

$$k = m\omega^2 \Rightarrow m\omega^2 = (P - F_e)/l \Rightarrow$$

$$m(2\pi/T)^2 = (P - F_e)/l \Rightarrow T = 2\pi[m l / (P - F_e)]^{1/2}$$



$$\text{Para o caso 2 resulta: } T = 2\pi[m l / (P + F_e)]^{1/2}$$

Tendo en conta que  $F_e = E \cdot q$  resulta un sistema de 2 ecuacións con 2 incógnitas: g e E.

$$T_1 = 3'14 = 2\pi[1 \cdot 10^{-3} \cdot 1'5 / (1 \cdot 10^{-3} \cdot g - 1'3 \cdot 10^{-6} \cdot E)]^{1/2}$$

$$T_2 = 2.07 = 2\pi[1.10^{-3} \cdot 1.5 / (1.10^{-3} \cdot g + 1.3 \cdot 10^{-6} \cdot E)]^{1/2}$$

Calculamos  $E = 3 \cdot 10^5 \text{ N/C}$

b) Por resolución derivada do apartado anterior obtense  $g = 9,9 \text{ ms}^{-2}$

**5.-** Un resorte mide 22'86 cm cando se lle colga unha masa de 70 gramos e 19'92 cm cando se lle colga unha masa de 40 g. Acha:

- A constante do resorte.
- A frecuencia das oscilacións se se lle colga unha masa de 80 g

**SOLUCIÓN**

a) Pola lei de Hooke sabemos que o alongamento do resorte é directamente proporcional á forza aplicada

$$F = Kx \text{ sendo } x = l - l_0 \text{ o alongamento e } K \text{ constante do resorte}$$

$$F_1 = Kx_1 \Rightarrow 0'07.9'8 = K \cdot (0'2286 - l_0)$$

$$F_2 = Kx_2 \Rightarrow 0'04.9'8 = K \cdot (0'1992 - l_0)$$

$$\text{Resolvendo obtemos: } l_0 = 0'16 \text{ m; } K = 10 \text{ Nm}^{-1}$$

b) A forza recuperadora do resorte é a causante da oscilación e polo tanto temos

$$Kx = mw^2x \Rightarrow K = mw^2 \Rightarrow w = (K/m)^{1/2}$$

Ó pendurarlle a masa de 80 g

$$w = (10/0'08)^{1/2} = 11'18 \text{ rads}^{-1}$$

$$\text{Como } n = w/2\pi = 1'78 \text{ Hz}$$

**6.-** Un punto material oscila cun M.H.S de amplitude 2 cm e frecuencia 10 osc/s. Calcular:

- A velocidade e aceleración máximas.
- A velocidade e aceleración no instante  $t = 1/120 \text{ s}$

**SOLUCIÓN**

a) Como non poñen condición para o inicio do movemento, consideramos que iniciámo-lo estudio partindo da orixe de coordenadas e o móvil diríxese cara os valores positivos de X, e polo tanto tomamos como ecuación do movemento:  $x = A \sin wt$

A ecuación da velocidade será:  $v = A w \cos wt$  e a velocidade será máxima cando o valor absoluto de  $\cos wt = 1$ , é dicir cando pasa pola orixe

$$\text{Como } n = w / 2\pi \Rightarrow w = 2\pi \cdot n = 20\pi \text{ rads}^{-1}$$

Entón substitúese e acádalo módulo da velocidade máxima:

$$v_{\text{máx}} = 1'26 \text{ ms}^{-1};$$

Ó deriva-la velocidade obtémo-la aceleración  $a = -Aw^2 \cdot \text{sen } wt$  e terá o seu máximo valor cando  $\text{sen } wt = 1$  é dicir ó pasar polos extremos, sendo o seu valor en módulo  $a = Aw^2$

$$a_{\text{máx}} = 78'96 \text{ m}\cdot\text{s}^{-2}$$

b) Unha vez vistas as ecuacións en función do tempo, só queda substituír. No instante  $t = 1/120 \text{ s}$  serán

$$v = 0'02 \cdot 20\pi \cdot \cos(20\pi \cdot 1/120) = 1'09 \text{ ms}^{-1}$$

$$a = -39'5 \text{ ms}^{-2}$$

**7.-** Un péndulo está constituído por unha pequena esfera, de dimensións que consideramos desprezables, de masa 200 g, suspendida dun fío inextensible, e sen peso apreciable, de 2 m de longo. Calcular:

- O período para pequenas amplitudes.
- Supoñamos que no momento de máxima elongación a esfera elévase 15 cm por encima do plano horizontal que pasa pola posición de equilibrio. Calcula-la velocidade e enerxía cinética cando pase pola vertical.

### SOLUCIÓN

a) Ó período do péndulo simple é

$$T = 2\pi(l/g)^{1/2}; T = 2\pi \cdot (2/9'8)^{1/2} = 2'84 \text{ m}\cdot\text{s}^{-1}$$

b) Ó despreza-las perdas de enerxía por rozamento aplícase o principio de conservación da enerxía mecánica de xeito que no punto máis alto estará toda en forma de  $E_p$  e no máis baixo en forma de  $E_c$ .

$$\text{No punto máis alto: } E_p = mgh = 0'2 \cdot 9'8 \cdot 0'15 = 0'294 \text{ J}$$

$$\text{No máis baixo: } E_c = 0'294 \text{ J}$$

$$(1/2)mv^2 = mgh \Rightarrow v = (2gh)^{1/2}; v = 1'71 \text{ ms}^{-1}$$

**8.-** Unha masa de 2 kg suxeita a un resorte de constante recuperadora  $k = 5 \cdot 10^3 \text{ N/m}$  sepárase 10 cm da posición de equilibrio e déixase en liberdade. Calcular:

- A ecuación do movemento.
- A enerxía potencial os 0'1 s de iniciado o movemento.

### SOLUCIÓN

a) A ecuación xeral do movemento harmónico simple é:

$$x = A \text{sen}(wt + f_0)$$

como nos din que o movemento comeza dende unha posición afastada 10 cm da posición de equilibrio, quere dicir que  $x_0 = A = 0'1 \text{ m}$  e como  $t_0 = 0$ , ó substituír,  $f_0 = \pi/2 \text{ rad}$

Por outra banda, como nos dan a constante do resorte e esta é  $K = m \cdot w^2$ , ó substituír obtemos  $w = 50 \text{ rad}\cdot\text{s}^{-1}$ .

$$\text{A ecuación queda } x = 0'1 \cdot \text{sen}(50t + \pi/2) \text{ m}$$

$$b) E_p = (1/2) Kx^2$$

Substituíndo t polo seu valor de 0'1s na ecuación do movemento obtemos  $x = 0'028$  m, e logo  $E_p = 2$  J

**9-** Un punto material de 500 g describe un MHS de 10 cm de amplitude realizando dúas oscilacións completas cada segundo.. Calcular:

a) A elongación de dito punto no instante 0'5 s despois de alcanza-la máxima separación.

b) A enerxía cinética que terá o punto móbil ó pasar pola posición inicial de equilibrio.

SOLUCIÓN

a) A partir da frecuencia  $n = w/2\pi$  obtémo-la pulsación  $w = 4\pi$  rad  $s^{-1}$

e tamén o período  $T = 1/n = 0'5$  s

Como o período é tempo que tarda o móbil en repetir tódalas características do movemento coincide co tempo indicado no enunciado, quere dicir entón que se atopará na posición da que partiu

$$x_0 = A = 0'1 \text{ m} \Rightarrow x_{t=0'5} = 0'1 \text{ m}$$

Podemos obtelo asemade directamente a partir da ecuación do movemento

$$x_{t=0'5} = 0'1 \cdot \text{sen}(4\pi \cdot 0'5 + \pi/2) = 0'1 \text{ m}$$

b) A enerxía cinética expresada en función da posición do móbil ten a expresión  $E_c = (1/2) \cdot m \cdot w^2 \cdot (A^2 - x^2)$ .

Como na posición de equilibrio  $x = 0$ , substituíndo obteremos

$$E_c = 0'40 \text{ J}$$

**10.-** Unha onda unidimensional propágase de acordo coa ecuación:

$y = 2 \cos 2\pi [(t/4) - (x/1'6)]$ ; onde as distancias "x" e "y" mídense en metros e o tempo en segundos. Determinar:

- O módulo da velocidade de propagación.
- A diferenza de fase, nun instante dado, de dúas partículas separadas 120 cm na dirección de avance da onda.

SOLUCIÓN

a) Da ecuación da onda sacámo-los seguintes datos:

$$A = 2 \text{ m}; T = 4 \text{ s}; l = 1'6 \text{ m}$$

como a velocidade de propagación da onda é:


$$v = l/T = 1'6/4 = 0'4 \text{ m} \cdot \text{s}^{-1}$$

b) Considerando que cando hai unha distancia  $x = l$ , a diferenza de fase é  $2\pi$ .

A diferencia de fase vén dada por  $2p(x/l) = 2p(1'2/1'6) = (3p/2)$  rad

**11.-** No sistema da figura, un corpo de 2 kg móvese a  $3 \text{ ms}^{-1}$  sobre un plano horizontal.

- Determina-la velocidade do corpo ó comprimirse 1cm de resorte, de cte.  $k=1000\text{Nm}^{-1}$ . Non se ten en conta a fricción.
- Compresión máxima do resorte.



### SOLUCIÓN

a) No momento do contacto do corpo co resorte, toda a enerxía do conxunto atópase na forma de enerxía cinética. Ó irse comprimindo o resorte esta enerxía cinética vaise transformando en enerxía potencial de xeito que cando estea no máximo de compresión toda a enerxía estará en forma potencial.

$$E_m = E_{C_{\max}} = E_{p_{\max}}$$

$$E_{C_{\max}} = (1/2)mv_{\max}^2 = (1/2) \cdot 2 \cdot 3^2 = 9 \text{ J}$$

$$\text{Nas posicións intermedias: } E_m = E_c + E_p = mv^2/2 + kx^2/2$$

$$\text{Logo, cando se ten comprimido 1 cm teremos } 9 = (1/2) \cdot 2 \cdot v^2 + (1/2) \cdot 1000 \cdot 0'01^2$$

$$v = 2'992 \text{ m} \cdot \text{s}^{-1}$$

b) No momento da máxima compresión, a en. Cinética é 0, e

$$9 = (1/2) \cdot 1000 \cdot A^2 ; A = 0'134 \text{ m}$$

**12.-** Un péndulo ten unha lonxitude de 1 m e un corpo colgado no seu extremo de 1 kg é desviado da súa posición de equilibrio quedando solto a medio metro de altura. Calcula-la súa velocidade no punto máis baixo:

- Por enerxías.
- Valora-la aplicación das ecuacións do M.H.S.

### SOLUCIÓN

a) Como a enerxía mecánica consérvase  $DE_p + DE_c = 0$ . Polo tanto, en valor absoluto,  $mgh = (1/2)mv^2$

$$\text{de onde } v = (2gh)^{1/2} ; v = (2 \cdot 9'8 \cdot 0'5)^{1/2} = 3'13 \text{ m} \cdot \text{s}^{-1}$$

b) Nun M.H.S., a ecuación correspondente para a velocidade é

$$v = A\omega \cos(\omega t), \text{ sen ter en conta o desfase inicial.}$$

A amplitude é

$$A = 1 \cdot \text{sen} [\arcsin(L-h)] = 1 \cdot \text{sen} [\arcsin(0'5)] = 1 \cdot \text{sen} 60^\circ = 0'866 \text{ m}$$

$$\text{Por outra banda, } \omega = 2p/T = (g/l)^{1/2} = 3,13 \text{ rad} \cdot \text{s}^{-1}$$


Como para a  $v$  máxima o coseno é 1 (en valor absoluto), temos

$$v_{\max} = Aw = 2,7\text{ms}^{-1}$$

Comentario: Vemos unha diferenza apreciable no cálculo por ambos métodos. O método das enerxías sempre é aplicable, mentres que o amplo ángulo ( $60^\circ$ ) fai desaconsellable o uso das ecuacións do MHS. O movemento non é un MHS.

## **CUESTIONS**

**1.-** Nun péndulo simple, indica cal das seguintes gráficas se axusta correctamente á relación enerxía/elongación:



SOL. c

Un péndulo sinxelo pode asimilarse a un oscilador harmónico. Nun oscilador harmónico a enerxía total do mesmo permanece constante e independente da elongación, sendo o seu valor  $E = (1/2) K A^2$ .

A gráfica a) sería incorrecta pois o máximo valor da enerxía potencial sería cando  $x=A$ . Cando  $x=0$  a Enerxía potencial sería nula.

A gráfica b) tamén é incorrecta pois a enerxía cinética máxima sería para  $x=0$  ó pasar polo punto central do movemento.

**2.-** De dous resortes elásticos con idéntica constante cólgase a mesma masa. Un dos resortes ten dobre lonxitude que o outro, entón, o corpo vibrará:

- a. Coa mesma frecuencia.
- b. O de dobre lonxitude con frecuencia dobre.
- c. O de dobre lonxitude coa metade da frecuencia.

SOL. a.

O período de vibración dun resorte elástico vén dado por:

$$T = 2\pi(m/k)^{1/2}$$

Se a masa e as constantes son iguais, o período de ambos, e polo tanto, a súa frecuencia serán iguais, ó non influí-la lonxitude do resorte.

Pola mesma razón, a non influencia da lonxitude do resorte, as outras dúas opcións son falsas.

**3.-** Cando un movemento ondulatorio se reflicte, a súa velocidade de propagación:

- a. Aumenta.
- b. Depende da superficie de reflexión.
- c. Non varía.

SOL. c.

A reflexión é un fenómeno ondulatorio polo que as ondas modifican a dirección na velocidade de propagación ó chocar contra unha superficie. Polo tanto, sen producirse cambio no módulo da súa velocidade de propagación, ó non cambiar o medio de propagación.

**4.-** Se se cambian á vez o ton e a intensidade dun son procedente dunha trompeta, ¿cales das seguintes magnitudes teñen que cambiar necesariamente?.

- a. Frecuencia e lonxitude de onda.
- b. Só a frecuencia.
- c. Amplitude, frecuencia e lonxitude de onda.

SOL. c.

As cualidades do son as que se refiren, intensidade e ton, están directamente relacionadas coa amplitude (intensidade) e coa frecuencia(ton). Por outra banda, frecuencia e lonxitude de onda para unha velocidade de propagación determinada, tamén están relacionadas entre si ( $v = \lambda n$ ).

Por isto, unha modificación de ton e intensidade supoñen unha modificación de amplitude, frecuencia e lonxitude de onda.

**5.-** A enerxía que transporta unha onda é proporcional a:

- a. A frecuencia.
- b. A amplitude.
- c. Os cadrados da frecuencia e da amplitude.

SOL. c.

Un mov. Ondulatorio é un movemento vibratorio que se propaga. De acordo coa ecuación que determina a enerxía do movemento vibratorio dunha partícula:

$E = (1/2)kA^2 = (1/2)mw^2 \cdot A^2 = (1/2)m4\pi^2n^2A^2$ , proporcional ó cadrado de frecuencia e amplitude

**6.-** Un movemento harmónico sinxelo determinado é a proxección doutro movemento circular uniforme. A aceleración centrípeta no movemento circular é:

- a. Maior ou igual á aceleración no MHS.
- b. Sempre menor.
- c. Menor ou igual á aceleración no MHS.

SOL.: a

A aceleración no MHS é unha función sinusoidal, máxima no punto de elongación máxima ( $a = w^2 \cdot A$ ) e nula no punto de equilibrio (onde a velocidade é máxima).

A aceleración centrípeta do movemento circular uniforme correspondente,  $a=w^2r$  será igual á devandita aceleración do MHS cando  $r= A$ , e sera sempre maior para valores  $r<A$ .

**7.-** Unha onda sen rozamentos amortécese de tal xeito que a amplitude é proporcional á inversa da raíz cadrada da distancia á orixe. Isto débese a que é unha onda:

- a. Esférica.
- b. Cilíndrica.
- c. Lineal.

SOL.: b

Tendo en conta que a intensidade do movemento ondulatorio é a relación entre a potencia (ou enerxía por unidade de tempo) e a superficie normal á dirección de propagación, teremos para ondas cilíndricas:

$$I= P/2\pi R.h$$

A intensidade é proporcional á enerxía e esta é directamente proporcional á amplitude de oscilación ( $E= 1/2 k.A^2$ ), resultará que I será directamente proporcional a  $A^2$  e inversamente proporcional a R. Polo tanto, A será inversamente proporcional a  $R^{1/2}$ .

**8.-** Escoitando un coro, atopamos nunha nota mantida que se producen altibaixos de sonoridade. Popularmente dise que é debido a que alguén "desentoa". Na realidade, o que pasa é que alguén:

- a. Está dando unha frecuencia sonora diferente ó resto.
- b. Está producindo unha intensidade diferente.
- c. A composición das frecuencias que constitúen a súa voz nese momento é diferente á dos seus compañeiros.

SOL.: a

Unha das cualidades do son, o ton, que nos permite distinguí-los sons agudos dos graves, depende da súa frecuencia fundamental. Cando as frecuencias fundamentais das ondas que se compoñen son diferentes, a composición das ondas pasa por intervalos de tempo nas que se producen interferencias constructivas e outros nas que se producen destructivas, interpretadas como altibaixos de sonoridade. Polo tanto "desentoar" supón modificar esta frecuencia fundamental.

**9.-** A velocidade dunha onda:

- a. Varía coa fase na que se atope o punto.
- b. Varía coa distancia do punto á orixe.
- c. Varía, se mantémo-la lonxitude de onda, coa frecuencia.

SOL.: c

A velocidade dunha onda é o resultado do produto da lonxitude de onda pola frecuencia, de aí que mantendo constante a lonxitude de onda, só se verá modificada por un cambio de frecuencia.


**10-** Na composición de dúas ondas luminosas das mesmas características prodúcense lugares onde non hai iluminación apreciable.

- a. Isto é unha reflexión.
- b. Prodúcese unha interferencia.
- c. Non é certo, non se produce nunca.

SOL.: b

As interferencias prodúcense por superposición de dous movementos ondulatorios. Neste caso estamos a considera-lo comportamento ondulatorio da luz. Cando dúas ondas luminosas estacionarias producidas por focos distintos que se propagan polo mesmo medio se atopan nun mesmo punto, prodúcese o fenómeno das interferencias. Posto que a luz ten natureza electromagnética, as perturbacións mutuas preséntanse como reforzos ou debilitamentos dos campos eléctricos e magnéticos, equivalentes á composición constructiva ou destructiva das mesmas.

**11.-** As condicións iniciais dun oscilador harmónico son: tempo ( $t=0$ ), elongación ( $x=0$ ) e velocidade ( $v^1 0$ ). ¿Que perfil representa correctamente a variación da  $E_c$  co tempo nun período?



SOL.:a

A enerxía cinética:  $E_c = (1/2)mv^2 = (1/2)m\omega^2(A^2 - x^2)$ , ten o máximo valor cando  $x=0$  que neste caso coincide con  $t=0$  e para un período completo a gráfica correcta é a 1 ( $t=T$ ).

**12.-** Dúas partículas teñen un MHS coa mesma frecuencia e amplitude e móvense na mesma traxectoria. Se se cruzan no centro da traxectoria, a diferenza de fase será:

- a.  $\pi/2$  radiáns.
- b.  $\pi$  radiáns.
- c.  $3\pi/2$  radiáns.

SOL.:b

Cando coinciden no centro de oscilación dous MHS coa mesma frecuencia, para ambos se cumpre que  $A \sin(\omega t + \phi) = 0$  co que  $\sin(\omega t + \phi) = 0$  e  $\omega t + \phi = n\pi$ , polo que ambas partículas teñen movementos que, nese momento (e polo tanto en tódolos momentos, pois a frecuencia é a mesma para ambos) só se poden diferenciar nun múltiplo de  $\pi$  radiáns. Se a diferenza fora múltiplo de  $2\pi$  radiáns estarían en fase, polo que a diferenza de fases ten que ser dun número impar de veces  $\pi$  radiáns.

**13.-** A enerxía mecánica dun oscilador harmónico:

- a. Duplícase cando se duplica a amplitude da oscilación.
- b. Duplícase cando se duplica a frecuencia da oscilación.
- c. Cuadruplicase cando se duplica a amplitude da oscilación.

SOL.:c

Como a enerxía mecánica dun oscilador harmónico é  $E = (1/2)kA^2$ , resulta que se duplicamos  $A$ , cuadruplicase  $E$ .

**14.-** Unha corda colga do alto dunha torre alta de xeito que o extremo superior é invisible e inaccesible, pero o extremo inferior si se ve. ¿Como averiguaría-la lonxitude da corda?

- a. É imposible.

- b. Medindo a amplitude da oscilación.
- c. Medindo o período da oscilación.

SOL.:c

Considerando un comportamento de péndulo simple, se medímo-lo período  $T = 2\pi (l/g)^{1/2}$ , coñecido  $g$ , poderemos calcula-lo valor de  $l$ .

(Nota: se a densidade lineal da corda non é desprezable, teríamos que aplica-la relación que nos dá o período nun péndulo físico, o que tornaría máis complicada a solución polo cálculo de  $l$  en función da densidade e lonxitude